

Investigacion

— Capitulo 6 —

**Prevalencia di Violencia Domestico
prome cu 18 aña di edad***Skirbi pa: mr. dr. Alida 'Lily' Marval*

Tin poco estudio haci riba violencia of maltrato contra muchanan y hoben. Den corant sa sali casonan di maltrato di mucha y hoben y tambe di abuso sexual di mucha. Pa e motibo ey a institui un Oficina Central yama "Bureau Sostene Mi" cu ta resorta bao di Ministro di Asuntunan Social unda cu personanan cu ta traha cu mucha, manera juffrouw of meneer di scol y docternan por yama pa denuncia casonan di maltrato di mucha.

Esaki a resulta den instalacion di un Comision Special pa studia e casonan di e Crisis Social aki cu ta consisti di Violencia di Pareha y di Violencia Domestico y cu tin e tarea pa presenta programanan pa combati y preveni e problemanan di abuso.

A dicidi di colecta informacion tocante Violencia Domestico prome cu 18 aña pa studia si tin un asociacion entre IPV y DV (prome cu 18 aña). A traha un cuestionario cu 18 pregunta tocante abuso emocional of psicologico, abuso fisico leve y mas fuerte y abuso sexual.

Na november 20 1989, e Asamblea General di Nacionnan Uni, a aproba e Tratado riba Derecho di Mucha y Hoben. E Tratado aki ta te dia di awe e Tratado mas acepta den historia. Estudionan tocante abuso di mucha y Hoben ta distingui 4 forma di violencia: (a). na cas: hopi biaha den forma di abuso verbal, disciplina fisico violento y otro forman di abuso. (b). violencia na scol; bullying y bringamento na scol. (c). bringamento entre hobennan cu cuchiu of revolver. E peleanan aki hopi biaha tin di haber cu trafico di droga. d. abuso sexual di mucha y hoben.

Pa hopi mucha y hoben, violencia sexual tin un cara conoci. Mucha hombernan ta core mas riesgo di muri un morto violento, mientras mucha muhernan ta mas vulnerabel pa bira victima di abuso sexual. Literatura científico ta siña nos cu muchanan y hobennan cu a cay victima di abuso por muestra sintomanan manera hopi miedo, ansiedad, problema pa expresa emocion, comportacion agresivo, dolor di stoma, insomnia, inseguridad, pishi cama y pesadia. Violacion ta conoci di causa inseguridad, ansiedad, miedo, poco estima propio, depresion y stress post-traumatico.

Midiendo prevalencia di Violencia Domestico prome cu 18 aña:

E siguiente preguntanan ta tocante situacionnan no-placentero y doloroso na cas y den circulo di amigonan cera. E preguntanan ta: (a). algun biaha bo a ser chercha of ridiculiza como mucha; (b). bo a yega di haya remarcacion ofensivo regularmente; (c). a yega di ser menaza di wordo saca for di cas; (d). ser

menaza di wordo herida; (e). ser menaza cu lo haci daño na un hende stima of un pet; (f). ser cera intencionalmente un caminda; (g). ser pusha duro contra algo; (h). ser teni na un manera duro te cu ta haci dolor; (i). a ser gedal of cu scop; (j). a ser hinca algun biaha cu un cuchiu of algo skerpi; (k). a ser kima intencionalmente cu un hero di strica, un cigarra cendi of otro cos cayente; (l). a ser abusa fisicamente di un of otro manera; (m). a ser amenaza cu golpi of violacion; (n). un persona homber of muhe a muestra bo su partinan intimo sin bo permiso; (o). a ser forsa pa wak actonan sexual; (p). a ser toca sexualmente sin bo permiso; (q). a ser forsa di mishi cu otro persona sexualmente; (r). a ser viola.



Manera por ripara, e prome 5 preguntanan ta tocante violencia psicologico of emocional. Despues a sigui 7 pregunta tocante experiancia di abuso fisico, 3 ta tocante violencia fisico leve y 4 tocante violencia fisico mas fuerte. E ultimo 6 preguntanan ta tocante violencia sexual. Tur respondientenan por a contesta 1 of mas di e preguntanan aki.

Resultado:

En total 404 (N=404) Participante a reporta cu nan por lo menos a experiancia un forma di abuso prome cu 18 aña. Esey kier men cu $404/758 \times 100 = 53.30\%$. Esey kier men cu mas cu mitar di e respondientenan a yega di experiancia por lo menos un forma di abuso intra-familiar prome cu 18 aña. E Prevalencia di Violencia Domestico prome cu 18 aña ta 1 di cada 2 persona.

E total di e contestanan di e respondientenan sin IPV tocante abuso emocional manera remarcacion ofensivo, cherkamento y ridiculiza e pareha, menaza di haci e pareha daño, menaza di sac'e for di cas ta 632. E total di e preguntanan contesta tocante abuso fisico manera dalmento y scopmento, kima cu un obheto of hinca cu un obheto skerpi ta 553. E total di e preguntanan contesta pa esnan sin IPV tocante abuso sexual manera touchmento sexual sin permiso di e otro persona, muestra e partinan sexual sin permiso di e otro persona, menaza di dal of viola e otro persona, touchmento forza sin permiso di e otro persona, of violacion, ser forsa pa wak actonan sexual ta 388. E total di e 3 forman aki ta 1573. Si compara e 3 forma di abuso aki, e abuso emocional ta esun mas halto cu ta 632 cu ta 40.18%; sigui pa abuso fisico cu ta 553 cu ta 35.16% y abuso sexual cu ta 388 cu ta 24.67%.